

天臺教觀畧說（三十六）——圓教之八（詮六即）

○《綱宗》云：相似即佛者，十信內凡位也。初信任運先斷見惑，證位不退。與別初住、通見地、藏初果齊。二心至七心，任運斷思惑盡。與別七住、通已辦、藏四果齊，而復大勝。故永嘉云：「同除四住，此處為齊；若伏無明，三藏則劣」也。八心至十心，任運斷界內外塵沙，行四百由旬，證行不退。與別十向齊。

○《綱宗》云：分證即佛者，十住、十行、十向、十地、等覺聖位也。初住斷一分無明，證一分三德。一心三觀，任運現前。具佛五眼，成一心三智。行五百由旬，初到寶所，初居實報淨土，亦復分證常寂光淨土。證念不退，無功用道。現身百界，八相作佛。與別初地齊。二住至十住，與別十地齊。初行與別等覺齊，二行與別妙覺齊。三行已去，所有智斷。別教之人不知名字。

○《綱宗》云：究竟即佛者，妙覺極果，斷四十二品微細無明，永盡究竟。登涅槃山頂，以虛空為座，成清淨法身。居上上品常寂光淨土，亦名上上品實報無障礙淨土。性修不二，理事平等。

